

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Ua na ô â hoi oia ia ratou, I haapaohia te sabati no te taata, aore te taata i haapaohia no te sabati: e teie nei, o te Fatu atoa ia o te sabati te Tamaiti a te taata nei.” Mareko 2: 27, 28.

Nu. 7.

10 Eperera, 1912.

Mat. 5.

Te Sabati o te Evanelia Nei.

TE na ô mai nei te hoê vea, o tei tae mai ia matou e, “E mea rahi te mârôraa i roto i te ao nei no te Sabati.” Aore roa'tu a matou e tufaa i taua mârôraa ra. Aore roa'tu a matou e hoê peapea iti haihai i taua vahi. Te na ô maira te hoê hiroa faaroo no matou e, 11. “Te haamori nei matou i te Atua Mana-hope mai tei au i te aau nei, e e faatia'tu hoi ia na reira atoa te taata atoa ia haamori, noa'tu te huru, e te vahi, e te mea ta ratou i hinaaro ra.” E au atoa ia parau atoa matou i te parau a te peropheta ra, a Iosua: “Area vau e to'u atoa utuafare, e haamori ia matou ia Iehova.”

I na matahiti e rave rahi hou te “Ekalesia Adivenite”, parauhia Haapaoraa Mahana Hitu, i faatupuhia, ua horoa mai te Fatu i te maramarama ia matou no te Sabati. I te hoê mahana Sabati, oia hoi, i te hitu no Atete, 1831, ua na ô maira te Fatu i Ta'na peropheta ra, ia Iosepha Semita:

“E ia tia maitai ia oe iho, eiaha ia viivii i to te ao nei, e haere oe i te fare pureraa i to'u ra mahana mo'a a pûpû atu ai i ta oe ra tusia; oia mau hoi, o te mahana teie i faataahia ia faaea oe i ta oe ra mau ohipa, e ia haa-

mori atu oe i te Tei Teitei ra, ia afai-atoa-hia râ ta oe ra mau opuaraa mai te parau-tia i te mau mahana atoa e i te mau taime atoa. A haamana'o râ oe e i teie nei mahana, te mahana a te Fatu, e pûpû ai oe i ta oe ra mau tusia e ta oe ra mau oroa ia'na, i te Tei Teitei ra, mai te fa'i i ta oe ra mau hara i to oe ra mau taeae e i mua i te aro no te Fatu." Buka Fafau 59: 9-12; B. F. S. 59: 2.

No teie nei faaueraa papu roa ta te Atua ora i heheu mai, i haapao ai matou i te mahana Sabati nei, no reira aita roa'tu e tapitapiraa i te reira vahi, a mârô noa'tu ai to te mau haapaoraa taata i teie nei parau.

Tena ô maira râ te hoê pûpû taata, aita e tia ia ratou ia farii i te reira heheuraa apî, no te mea o te Bibilia ana'e ra maori ta ratou e tiaturi nei. Pahonora: Te tiaturi nei matou i ta te Bibilia e i ta te heheuraa apî atoa hoi; o te mea ia te reira i papu roa'e to matou faaroo nei, no te mea e Atua ora te Atua, e e haamaramarama mai Oia, mai te parau hua mai i ta'na ra mau peropheta i te mau vahi poiri. O ta'na ravea maori te reira. Amo. 3: 7. Eph. 4: 11-13.

I roto i teie nei heheuraa i nia nei, ua haapao-hua-hia te mahana matamua o te hebedoma ei Sabati mau, ei mono i te Sabati mahana hitu o te faufaa tahito, e na au hoi te reira faaueraa i ta te Faufaa Apî.

Ua haapaohia Iesu ei upoo i nia iho i te mau mea atoa i te ekalesia nei, Eph. 1: 22; e o te Fatu atoa hoi Oia no te Sabati. Mar. 2: 27, 28. No reira e imi tatou i ta'na ohipa e ta'na haapiiraa no na mahana e piti, te mahana hitu e te mahana matamua. Eaha ta Iesu i rave i te Sabati mahana hitu? Pahonora: Ua faahapa Oia i te reira mahana: "Ua rahi roa maira to te ati Iuda titau ia'na e taparahi, Oia i faahapa i te Sabati." Ioa. 5: 18.

No te mea ua faahapa Iesu i te Sabati tahito, aita anei Oia i na muri i te faaite mai i te tahi atu â mahana? Ua na reira mai Oia. Te tatara maira Paulo i te parau no na mahana e piti i te na ôraa mai e: "Te na ô maira hoi Mose i te hoê vahi i te parau i te mahana hitu ra e, Faaea ihora te Atua i te mahana hitu i ta'na atoa ra mau ohipa." Heb.

4: 4. No te faaroo ore râ o Iseraela tahito aore ratou i ô i taua faaeearaa ra. "Ahiri hoi Iosua (Iesu) i horoa i te faaeearaa no ratou, e ore hoi te Atua e na muri i te faaite mai i te tahi â mahana." Heb. 4: 8.

Ua faaite mai râ Iesu i te tahi â mahana, no te mea, mai te Atua i faaea i ta'na ohipa i te hoê mahana, ua na reira atoa Iesu i te tahi â mahana, oia hoi te mahana mata-mua o te hebedoma. I te reira mahana hoi i upootia'i Oia i nia i te pohe e ua ô atu Oia i to'na ra faaeearaa. "E teie nei te vai ra maori te faaeearaa no te taata no te Atua." Heb. 4: 9. Eiaha te mahana hitu no te mea ua na muri te Atua i te faaite mai i te tahi â mahana. Heb. 4: 8. Te parau mai nei â te irava i raro a'e no to Iesu faaeearaa: "O tei ô hoi i te faaeearaa o te Atua ra, ua faaea ia Oia (o Iesu) i ta'na atoa ra mau ohipa mai te Atua hoi i faaea i ta'na ra." Heb. 4: 10. Ua parauhia teie nei mahana faaeearaa apî ta Iesu i haapao, "Te mahana o te Fatu." Apo. 1: 10.

Ua faaite atoa mai na te Atua i te vaha o Hosea peropheta ra e faaorehia ia te mahana Sabati o te ati Iuda, ua na ô maira hoi Hosea:

"E faaore atoa vau i to'na (to Iseraela) mau mea arearea, i to'na ra mau mahana oroa, to'na mau marama apî e to'na mau Sabati e to'na mau amuiraa rahi mo'a ra." Hosea 2: 11.

E ui tatou no teihea faufaa te ture no te Sabati i papaihia i te Exo. 20: 8-11? Pahonoraa: No te faufaa mata-mua ia, oia hoi, no na ture 10 ta te Atua i horoa mai ia Mose i te matamua, eiaha to te evanelia nei. Te na ô maira tei papaihia ra:

"Ua faaau mai to tatou Atua ra o Iehova i te faufaa ia tatou i Horeba. Aore Iehova i faaau mai i taua faufaa nei i to tatou mau metua (ia Adamu, Noa, Aberahama, e Iakoba) ia tatou nei râ, tatou atoa e ora nei i teie nei mahana." Deut. 5: 1-3.

Te faaite mai nei teie nei irava, aore te mau metua o Iseraela, (o Adamu, o Noa, o Aberahama, e o Iakoba) i ite i teie nei faufaa no reira mai te Sabati. Taua faufaa nei o na ture 10 ia.

“Ua parau maira hoi Iehova ia outou i rotopu i taua auahi ra - - - e ua faaite maira Oia i ta'na ra faufaa ta'na i parau mai ia outou ia rave, i na parau hoê ahuru aore; e ua papai ihora hoi Oia i te reira i nia iho i na pāpā ofai e piti ra.” Deut, 4: 12, 13, e te 5: 22. A hi'o atoa hoi i te haapapuraa i teie nei vahi i roto i te Exo. 34: 27, 28; e te Nehe. 9: 13, 14.

Na teie nei mau irava parau i nia nei e haamau maite i te parau ra e, aita roa'tu to mau taata i mua'tu i tetau no Mose i ite i teie nei ture no te Sabati, aore hoi te i'oa Sabati i faahitihia i mua'tu i te reira tau.

Eaha, aita anei Adamu ma e ta'na iho huaai i haapao i te mahana hitu ei Sabati? Aita roa ia. No te aha? No te mea aita te ture no te Sabati i horoahia'tu i to mua ia Mose, mai ta te mau irava i nia nei i faaite mai. A taio faahou na i taua mau irava ra. E no te mea hoi e, o te Atua ana'e e to te ra'i ra tei faaea i te mahana hitu, i te faaotiraa i ta te Atua ra mau ohipa; e taua mahana faaea-raa matamua no te Atua ra e 1000 ia matahiti i to tatou nei taioraa; 2 Pet. 3: 8. I roto i te ono o te mahana i hamanihia'i Adamu ma e no reira aita'tura raua i ite i te hopea no taua mahana faaearaa matamua a te Atua a pohe atu ai raua, aita hoi raua i tae i te 1000 matahiti i te oraraa. E no reira aita'tura Adamu ma i ite i te ture no te mahana hitu i te fenua nei, o Mose râ tei farii i te reira ture i te matamua ra.

Aita atoa Aberahama ma i ite i te faufaa matamua no reira mai te ture o te Sabati, o te ture evanelia râ ta ratou i ite e i haapao hoi hou te tuuraahia mai te ture o te Sabati, mai ta Paulo i faaite maira i roto i te Galasia, pene 3, o te na ô maira:

Irava 8. “Ua faaite atea mai te parau i papaihia ra e e tiahia te etene e te Atua i te faaroo, i faaite ai i te evanelia ia Aberahama i mutaa ihora. 17. E teie nei, teie ta'u parau, o te faufaa o te Mesia i fafauhia (ia Aberahama) e te Atua i mutaa ihora, e ore e tia i te ture, a maha a'e-ra hanere e toru ahuru mahahiti i tuuhia mai ai, ia faaore, a riro ai tei parauhia maira ei mea faufaa ore. 19. No te aha hoi te ture (i tuuhia mai ai)? I tuu-atoa-hia mai ai te reira no te hara. 23. I mutaa ihora

aita te parau ra i te faaroo i itea mai, i tapeahia tatou i opanihia i roto i te ture e ia tae i te faaroo e faaitehia mai (e te Mesia) a muri atura. 24. Riro atura te ture ei orometua e aratai ia tatou i te Mesia ra ia faatiahia tatou i te faaroo. 25. Teie nei râ, ua itea mai te faaroo nei, aita'tura tatou i vaiihohia i raro a'e i te aratai."

To mua'tu ia Mose ua haapiihia te ture evanelia, eiaha na ture 10 ra mai tei faaitehia nei, no reira aita ratou i ite i te ture maha o te faufaa i tuuhia mai ia Mose e 430 matahiti i muri mai. E 430 m. i muri mai ia Aberahama a ora'i Mose na taatihia mai te ture o te faufaa tahito i nia i te evanelia. No te aha? No te aau etaeta e te hara o te tamarii a Iseraela i taatihia mai ai. Gal. 3: 19. Ua riro te reira pueraa ture etaeta ei tairiraa ia papaihia Iseraela haapao ore. E huru ê roa to teie taatiraa nei e to te ture evanelia. O tei haamau atu, ua haamau-atoa-hia mai oia, e mata ra ei mata ia, e niho ra ei niho ia. Lev. 24: 20. I te evanelia râ e faaho'ihia te aroha no te ino, e eiaha ei tahooraa'tu i tei hamani-ino mai. Mat. 5: 44.

Taua mau ture 10, e to ratou mau utua i taatihia ra, ua haapaohia ei faufaa mure noa; oia ia, ua tuuhia mai ei orometua e ei aratai ia Iseraela i te Mesia, e ia tae mau mai te Mesia ua haapaehia taua taatiraa nei, o taua aratai ia, e ua monohia te reira i ta Iesu haapiiraa. Ua hope roa taua faufaa matamua ra i te tupu ia Iesu e ua *faatiahia* te ture tahito i ta'na haamauraa i te evanelia. Ua parau mai o Paulo ia Iesu: "Inaha e tau Atua, te haere nei au e faatia i to oe hinaaro, ua faaore â ia Oia i tei mutaa i hora, ia faatia Oia i te piti." Heb. 10: 9. No te mau mea toe e te paruparu i te faufaa matamua i faaôhia mai ai te faufaa piti, oia hoi te mau ture o te faufaa mure ore. Heb. 8: 6, 7, e te 7: 12, 16-18. Te ture no te Sabati mahana hitu ua tuuhia mai i roto i te faufaa matamua ra, o tei faatiahia e, o tei faahopehia hoi ia Iesu, e tena na, e faafariu tia mai i to tatou mata ia Iesu ia maramarama tatou i ta'na haapiiraa.

(E tuatihia mai teie parau.)

Te Parau Tuatapapa no
Iosepha Semita.

(TUATIRAA.)

PENE XIX.

MATAHITI 1833-1834.

Ua haamanuhia te niu no te hiero i Ketelani. Ua haere Iosepha i te fenua ra, i Canada, e poro-haere i te Evanelia. Ua faatiahia te Apooraa Rahi matamua. Ua haapututuhia te Nuu no Ziona, e ua riro Virifora Vudurufa ei melo no taua nuu ra.

I ROTO i te matahiti no te hamani-ino-raa-hia o te Feia Mo'a i Missouri, ua rahi roa te ohipa ta te peropheta ra, ta Iosepha Semita i rave ra. Aita e tia ia'na ia amui atu ia ratou i to ratou ati rahi, area râ ua haponu atura oia i te mau leta e rave rahi, i te a'oraa'tu ia ratou, e i te faaiteraa'tu ia ratou i te mau parau ta te Fatu i parau maira ia'na. I te hoê taime, ia faaroo oia i te mau hamani-ino-raa o te enemî, ua auê i hora oia, na ô a'era, "Auê, to'u mau taeae here e! To'u ia hinaaro i amuihia'tu ai au ia outou i to outou ati rahi. E te Atua Mana-hope e, nahea'tu tatou i roto i te ati rahi mai teie i te huru." E rave rahi te mau parau iino i parauhia no Iosepha, ua parau maira râ to'na enemî e, e taata mātā'u ore roa oia.

I te mahana 23 no Tiurai, 1833, te mahana i haapututupu ai te enemî i Inidipenideni, i te afairaa mai i te hoê reva uteute, ia faaue atu ratou i te Feia Mo'a ia parau mai e, e faarue ratou i taua fenua ra, ua haamanuhia te niu no te fare o te Fatu, oia hoi te hiero, i Ketelani. E i teie nei, ua ite tatou i te tumu o te Atua no te parahiraa o te tahi pae no to te Ekalesia i Ketelani, e te tahi pae i Missouri.

I te mahana pae no Atopa, 1833, ua faarue Iosepha, ratou o Sidine Ritidone, e o Feremana Nekesona, i Ketelani,

e ua haere atura ratou i te fenua ra, i Niu Ioka, e i te fenua ra, i Canada, e poro-haere i te Evanelia i reira. I te mau mahana atoa, ua a'o atura ratou i te parau a te Atua, e i te tahi mau taime, baptizo atura ratou i te mau taata. Ua manuia roa to ratou ohipa, no te mea, aita ratou i baptizo i te mau taata ana'e, ua faaineine râ ratou i taua fenua ra no te hoê auhune maitai a muri atu.

I te hoê pô i te oire ra, i Culburn, i Canada, ua haapao ratou i te hoê pureraa. Te mairi puai maira te hiona, area râ ua tairuru mai te mau taata e rave rahi i roto i te fare pureraa, e ua tamata Iosepha, raua o Sidine i te parauraa'tu i te parau no te ora mure ore. Te parahi ra te hoê taata no te haapaoraa Metodi i rotopu i taua amuiraa ra, e aita oia i hinaaro ia manuia Iosepha, raua o Sidine i ta raua parauraa'tu, e no reira ia haamatahia te pureraa, ua maniania roa oia, parau maira oia ma te re'o puai roa i te mau parau maamaa roa. Ua pahono atura Iosepha, raua o Sidine ia'na ma te parau mârû e te haebaa, i te parauraa'tu i te parau mau e te parau paari, e no reira ua riro te rê ia raua, e ua mamû roa oia.

I te oire ra, i Mount Pleasant, ua baptizohia e hoê ahuru ma ono taata i roto i na mahana e piti, e ua riro ia ratou te mau tapao i parauhia maira e Iesu Mesia i te feia fâaroo ra. Ua tae maira te Varua Maitai i nia iho ia ratou, e na roto i te mana o taua Varua ra, ua parau atura te hoê tuahine i te parau êê, e ua popou ihora te Feia Mo'a, no te mea ua ite ratou e, o te Evanelia mau teie ta te Mesia i haapii atura.

Ia ho'i faahou maira te peropheta i te oire ra, i Ketelani, haponu atura oia i te mau leta e rave rahi i te mau taeae e te mau tuahine i Missouri, area râ ua parahi ihora oia i te fenua ra, i Ohio, e na roto i te tau toetoe, e mea rahi roa te ohipa ta'na i rave ra. I te avae ra Ditema, ua afai maira Olive Taudere, raua o Vitine Episekopo ra i te hoê machine neneiraa parau apî, no te mea aita e tia i Feia Mo'a ia nenei i te "Fetia Ahiahi e te Poipoi," i te mataeinaa ra, ia Iaketoni, e aita ratou i hinaaro ia faaea noa i te neneiraa i taua vea ra. Ua faatiahia te machine neneiraa parau apî, e ua opua ratou i te nenei faahou i te "Fetia", e ua faarirohia Olive Taudere ei faaau parau. Ua haamaitahia te piha neneiraa i te mahana 18 no Ditema.

I te 17 no Febuare, 1834, ua faatiahia te Apooraa Rahi matamua no te Ekalesia, i Ketelani. Ua faatiahia teie nei Apooraa Rahi i na Tahu'a Rahi e hoê ahuru ma piti, e na Iosepha e ta'na na tauturu e piti i faatere. O teie ia te ohipa no taua Apooraa Rahi ra, oia hoi, ia haavâ i te mau taata, o tei rave i te hara, no to ratou tiaraa i roto i te Ekalesia e ia faaore i te mau peapea, tei tupu i rotopu i te Feia Mo'a, ia ore ratou e haere i te ture no te fenua. Ua parauhia teie nei na Tahu'a Rahi ia faaroo, e ia paraparau i nia i te mau peapea, ei reira faaite atura te peresideni i to'na ihora mana'o. I roto i te mau haavâraa nainai, ua maitihia e toopiti taata ia parau atura, e i te faaore-raa-hia o te peapea rahi, ua maitihia e toomaha, e aore râ e tooono taata. I muri i taua taimera, e rave rahi te mau Apooraa Rahi, tei faatiahia, e i teie nei, tei te mau tîti atoa no Ziona te hoê Apooraa Rahi. No te ohipa rahi o te peresideni no te Ekalesia i teie nei, aita nehenehe ia'na ia faatere i teie nei mau Apooraa Rahi, area râ na te peresideni no te mau tîti e faatere i te Apooraa no to'na ihora tîti. Mau mea faufaa rahi roa teie, no te mea, e noaa i te mau taata'toa te utua tia roa, no te mea te haavâhia ra ratou mai tei au i te ture a te Atua e eita ratou e aufau i te moni.

E faaotihia a'era teie nei ohipa, ua haamata Iosepha i te imi i te mau taata ia haere i Missouri. Ua faauehia oia e te Fatu, na roto i te hoê heheuraa, ia haaputuputu i te mau taata apî, e te mau taata huru paari, e ia farii i te moni i horoahia e te Feia Mo'a. Ua parau maira te Atua e, mai te mea e faaite atu Ta'na ra feia i te faaroo e te parau-tia, e faaora Oia i Ziona. Ua ravehia te moni ia hoo i te tahi mau fenua, e ia tauturu i te mau taata tei roohia e te ati. Ua haamata Iosepha i te rave i teie nei ohipa i te mahana 26 no Febuare, 1834. Haere atura oia, raua o Pare P. Paraita i te pae i te hitia o te râ, i tera vahi e i tera vahi, i te a'oraa atu, e i te faaiteraa'tu i te Feia Mo'a e, te hinaaro ra te Fatu i te mau taata e te moni, e ua manuia raua i te mau vahi e rave rahi. Ua haere atoa'tura Sidine Ritidone e te tahi atu mau taata, e na muri i te hoê avae, ho'i faahou maira ratou.

I muri a'e i to Iosepha taeraa mai i Ketelani, ua parauhia oia ei ite i roto i te haavâraa no te hoê taata, o Dr. P. Hurlburt to'na i'oa, e taata taiva oia, o tei haamâta'u atura

i te taparahi ia'na. Aita Iosepha i hinaaro ia na reirahia, area râ aita'tu ia ravea. Ua haavâhia teie nei taata i te hara haamăta'u i te taparahi, e i te mahana 9 no Eperera, ua tuuhia te utua i nia iho ia'na, e o teie ia, oia hoi, ua au-fau oia e toru hanere dara.

I roto i teie nei avae, haapao ihora Iosepha i te tahi mau pureraa, e te faaineine ra oia i te mau taata, o te haere i Missouri, i parauhia ratou e, te Nuu no Ziona. I te mahana hoê no Me, ua ineine e piti ahuru taata e tiahapa, e e maha pereoo, i te faarue i Ketelani. Ua haere atura ratou e pae ahuru maile i te oire ra, i Niu Poratage, ei reira faaea'i, ia tae mai te pŭpŭ piti. Tei te pŭpŭ matamehai o Vilifora Vudurufa, o tei bapetizobia i te mahana hopea no te matahiti 1833, i Ritilanada (Richland), i Niu Ioka, e i te 25 no Eperera, haere atura oia i Ketelani, ia riro oia ei melo no taua pŭpŭ taata ra. Ia farerei oia i te peropheta ra, ia Iosepha, ua horoa'tura Virifora i ta'na 'o'e ia'na, ia afai atu i Missouri, ei te aratai no te Nuu no Ziona. Ua haapao maitai ihora Virifora Vudurufa i to'na ra ohipa i te mau taime atoa, e te aroha rahi, tei faatupuhia i reira, i ropu ia Virifora raua Iosepha, e vai te reira e a muri noa'tu.

E piti mahana i muri i te faarueraa o te pŭpŭ matamua i Ketelani, pee ê atura Iosepha ia ratou ma te pae rahi o te nuu. Ia amuihia'i teie nei na pŭpŭ taata e piti, teie te numera i taiohia, oia hoi, hoê hanere, e pae ahuru e tiahapa. Ua faataa Iosepha i te nuu i roto i te mau pŭpŭ nainai, e hoê ahuru ma piti taata i roto i te pŭpŭ hoê, e ua maiti te mau pŭpŭ i to'na ihora raatira, o tei faaite atu i te mau mea ta ratou e rave, e ua maiti-atoa-hia te tahi mau raatira rahi.

Ua faatomo-puai-hia e piti ahuru pereoo, i ravehia e te nuu, i te maa, e te mau mea maitatai e au i te Feia Mo'a i Missouri. Aita te hoê vahi toe na te mau taata, e no reira haere atura ratou na raro. Tei ia ratou ta ratou mau pupuhi e ta ratou mau pupuhitereumu, e te tahi atu mau mauhaa tama'i, area râ, ua rave ratou i teie nei mau mea ei paruru ana'e na ratou. O te hoê pŭpŭ rahi teie no te Autahu'araa, i parauhia e te Atua, ia haere atu, aore e tama'i, e aore râ e haru, e paruru râ, e e tamahanahana'tu ia ratou, o tei roohia e te ati.—OLE PETESONA.

(E tuatihia mai teie parau.)

Te Mau Parau Api.

I TE oire ra, i Paris, i Farani, te ora nei te hoê puaatoro ufa, o tei hau i te nainai i te mau puaatoro atoa i te ao nei. E piti avae oia i te teitei, e ua tae oia i te pae o to'na ra matahiti. Te horoa nei oia i te û maitai roa.

I te fenua ra, i Tarafonia, i Amerika, ua tupu te hoê raau, tei hau i te rahi i te mau raau atoa i te ao nei. Teie te rahiraa, oia hoi, 300 avae i te teitei, 90 avae i te haati i te tumu, e 29 avae na roto. Ua haamata teie nei raau i te tupu i te matahiti 550.

Ua pohe a'enei to tatou taeae o Kumea a Tagia i te fenua ra, i Magareva. Ua bapezohia oia e ua faatoroahia ei peresibutero i roto i te Ekalesia a Iesu Mesia i te Feia Mo'a i te Mau Mahana Hopea Nei, e ua rave itoitoe oia i te mau ohipa o te Ekalesia i te mau matahiti e rave rahi, e tae noa'tu i to'na poheraa.

I te fenua ra, i Brazil, i Amerika apatoa, ua iteahia te hoê ofai tarisisa faufaa rahi roa e te hoê taata Turekia. Teie te rahiraa, oia hoi, e hoê ahuru ma iva initi i te teitei, e e hoê ahuru ma ono initi i te aano, e teie te teiaha ia faitohia, oia hoi, e piti hanere, maha ahuru ma toru paunu. Ua hau teie i te rahi i te mau tarisisa atoa i iteahia, e ua hoohia i te moni rahi roa, oia hoi, 25,000 dara.

I te mahana 12 no Febuare, i mairi a'enei, amui atura te hau Taina, oia hoi, te fenua Tinito, i te mau repupirita o te ao nei, e ua riro ihora oia ei hau repupirita. I taua mahana ra, na roto i te riroraa o Taina ei repupirita, ua riro e maha hanere milioni (400,000,000) taata ei mau taata tiamâ. Ua ite atura te hau Amerika e te mau repupirita rahi o te ao nei i teie nei repupirita api, e ua faarirohia o Yuan Shi Kai ei peresideni no taua hau apî ra.

I te 21 no Febuare, i mairi a'enei, i te fenua ra, i Texas, i Amerika, ua tupu te hoê auahi rahi roa. Aita te tumu i itea, area râ, ua haamata te auahi i te hora hoê ahuru ma piti i te pô, e na te mātā'i rahi i haapuai i te auahi, e e rave rahi te mau fare tei pau. Ua pau te mau fare parahiraa e rave rahi, e te mau fare ohipa, e ua pau e maha ahura ma pae tausani puohu vavai i te auahi, e teie te rahi o te moni, oia hoi, 2,000,000 dara. Ua pau e piti hanere, e pae ahuru fare parahiraa, e ua haere te mau taata, e te mau vahine, e te mau tamarii i nia i te purumu. Ua tauturu-maitai-hia ratou e te mau taata e rave rahi no taua oire ra, o tei horoa'tuia ratou i te moni, e te maa, e te ahu. Teie te rahiraa o te moni i pau i taua auahi ra, oia hoi, 7,000,000 dara,

I te fenua ra, i Amerika, ua pohe roa te hoê taata ruau roa, o Ioane Moraga to'na i'oa, e teie to'na matahiti, oia hoi, hoê hanere, e piti ahuru ma maha. Ua hau paha oia i te ruhiruhiaraa i te mau taata i Amerika.

I te fenua ra, i Tarafonia, i Amerika, te tupu nei te hoê raau, e tei nia iho i taua raau ra, e toru huru hotu, oia hoi, te anani, te lemoni, e te tahi atu huru hotu, e tei ia ratou to ratou huru mau. No te paari, e te ite rahi teie no te tahi mau taata, o tei poi atu i na huru raau i roto i te raau hoê.

Ua tupu te mau vai pue rahi roa, i te fenua ra, i Poratugala, i Europa, e ua rau i te hanere te mau taata, o tei poia roa, no te mea ua pau ta ratou maa i te pape. Ua haponu atura te hau Poratugala i te maa i to te mau vahi, tei roohia e te mau vai pue. Teie te rahiraa o te moni i pau, oia hoi, 10,000,000 dara.

I te fenua ra, i Okalahoma, i Amerika, ua horoahia te hoê avae taata, i hamanihia i te raau, ia Iakoba Ranadala, e te hoê atu taata, na mua a'e i to'na poheraa. Na muri i te poheraa o teie nei taata, ua iteahia i roto i taua avae raau ra, 10,000 dara. Ua noaa ia Iakoba teie nei moni, e no reira, ua mauruuru roa oia i to'na ra hoa tei pohe.

Te parahi nei te hoê taata i te oire ra, i Paris, i Farani, o Tihoti Menada to'na i'oa, e teie to'na ohipa, oia hoi, ia haere na roto i te rui e haru i te mau huru iore atoa. Aita ta'na e tapea, maori râ te hoê mori e te hoê pute. Te haere nei oia ma ta'na mori, mau atura i te iore, e tuu i roto i te pute. E rave rahi te mau iore ta'na i rave.

I te oire ra, i Chicago, i Amerika, ua roohia te hoê urî na te hoê taote niho, no te mea, ua mamae roa to'na niho. Ua hi'opoa te taata i te niho no ta'na urî, ei reira iriti atu oia i te mau niho atoa. Hamani ihora oia i te tahi atu mau niho apî i te auro mau, e tuu i roto i te vaha no te urî, e i teie nei, e tia i te urî ia amu i te mau huru maa atoa. Teie te rahiraa o te moni no te mau niho auro apî no taua urî ra, oia hoi, hoê hanere, hoê ahuru ma piti dara.

Parau faaite teie no te poheraa o te taata ra o Pahero, i te mahana 4 no Eperera nei. Mai teie te huru: Ua inu oia i te ava e i muri a'e, ua haere oia e to'na mau hoa i nia i te pereoo puaahorofenua, e ua faahoro mai oia i taua pereoo ra, na te purumu i uta i ð te paretenia, e faatipu atura i te purumu i ð Caradera, horo tia'tura i tai, e tae atura i te faatipuraa i ð Popoti, ua û teie nei pereoo i nia i te tumu raau, i te pae tai, e ua û atoa teie nei taata i taua tumu raau ra, e mairi ihora i raro, e ua pohe roa oia. Ua tiihia te mau taote, haere e hi'o, a hi'o râ ratou, ua pohe roa. Ua rare-rare roa to'na upoo, e ua tahe mai te toto o taua taata, e ua tupu te ri'ari'a o te taata. E rave rahi i putuputu i reira.

Ua hamani te hau Purutia i te hoê ture i te faaoreraa i te mau faaipoiporaa i te fenua ra, i Samoa, i ropu i te mau papaa e te maohi. E i teie nei, aita nehenehe i te mau taata papaa ia faaipoipo i te mau vahine maohi no taua fenua ra.

I te oire ra, i Oakland, i Tarafonia, i Amerika, te haere ra te hoê taata Tinito, o Toina Gaina to'na i'oa, i roto i te reva, na nia i ta'na pahi reva. Ua tupu te peapea i ta'na pahi reva, e aita e tia ia'na ia haapao i te machine, mairi ihora oia e hoê hanere avae i raro, e ua haaparuparu-roa-hia oia.

I te avae ra, Febuare i mairi a'enei, i te fenua ra, i Nevada, i Amerika, ua fanau te hoê fanaua puaatoro, e e piti upoo to'na. Ua haamata te piti upoo i mua i to'na tari'a. Teie to'na huru, oia hoi, e piti tari'a ana'e to'na, e piti rae, e maha mata, e piti ihu, e piti vaha, e e piti arapoa. Ua maitai roa to'na mau melo, e te tupu noa nei â oia.

Te tere atura te hoê pahi auahi tavere, o Redonido to'na i'oa, i nia i te moana, i fatata roa i te fenua Amerika, e ua û oia i te hoê tohora rahi roa, a taoto ai oia i roto i te miti, e ua faaea te pahi i nia iho i to'na tua. Ia û te pahi i taua tohora rahi ra, ua auene roa oia, e ua mairi te mau taata, tei nia iho ia'na, i nia i te tahua pahi, e i faaea noa te mau machine. Ua parau maira te raatira no taua pahi ra e, ahiri i hinaaro ai taua tohora ra, e tia ia'na ia huri i te pahi, e faatomo ia'na i roto i te miti, area râ, e tohora rata tera, e no reira, hopu ana'e ihora oia i raro roa, e au ê atura. E pahi huru rahi tera, area râ, ua taitoruhia te tohora i te rahiraa.

I te avae Febuare i te oire ra, i Bingham, i Utaha, i Amerika, ua tupu te hoê peapea rahi roa. Te haere ra te hoê pereoo auahi na nia i to'na e'a i nia i te mou'a, e ia tupu te tahi peapea i te pereoo auahi, aita e tia i te mau taata ia haapao ia'na, e no reira haere taue noa'tu te pereoo auahi, e ua faarue oia i to'na e'a, topa ihora i raro e hitu ahuru ma pae avae. Tei te pae raro no te mou'a te tahi mau fare, e ia topa te pereoo auahi, ua tae oia i nia iho i te tapoi no te hoê fare hamaniraa ahu, haere noa ia na rato i teie nei tapoi, e na roto i te hoê fare toa tiaa, e na roto i te pae muri no te hoê fare vairaa moni, ei reira faaea'i. Ua pohe roa e toomaha taata, e ua haaparuparu-roa-hia e toovau taata. Ua haapohe-roa-hia e toopiti taata, a taoto ai raua i nia i to raua roi i roto i te fare hamaniraa ahu, no te mea aita roa raua i faarahia. Ua tupu te peapea i te hora hitu i te poipoi, e ua mehameha roa te mau taata'toa o tei ite i teie nei mea.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.